

Visoki predstavnik pozdravlja imenovanje predsjedavajućeg Skupštine Hercegovačko-neretvanskog kantona



Kao rezultat konstruktivnih razgovora koji su jučer održani u Mostaru, visoki predstavnik Christian Schwarz-Schilling odlučio je da privremeno obustavi primjenu dijela finansijskih sankcija, koje je donio Odlukom od 29. maja 2007. godine, protiv političkih stranaka u Hercegovačko-neretvanskom kantonu, a koje su trebale stupiti na snagu danas.

To je uradio nakon što su političke stranke učinile prvi korak ka formiranju kantonalne vlade izabravši predsjedavajućeg i zamjenike predsjedavajućeg Skupštine Hercegovačko-neretvanskog kantona, kao što je jučer obećano visokom predstavniku.

Visoki predstavnik će nastaviti da pažljivo prati dešavanja u Hercegovačko-neretvanskom kantonu, kako bi se uvjerio da su implementirana naredna tri dijela jučerašnjeg dogovora: Stranke su dužne da do ponedjeljka, 11. juna, dostave imena kandidata za mandatara vlade; predsjedavajući Skupštine treba da do petka, 15. juna, zvanično predloži mandatara vlade kantonalnoj skupštini, a vlada mora biti potvrđena do 22. juna 2007. godine.

U slučaju nepoštivanja rokova za bilo koji od preostala tri koraka, finansijske sankcije u smislu daljnjeg oduzimanja budžetskog novca koji je namijenjen strankama automatski će biti ponovo aktivirane, u skladu sa Odlukom visokog predstavnika od 29. maja 2007. godine.

U međuvremenu, dio sankcija koji se odnosi na generalnu

obustavu isplate finansijskih sredstava iz budžeta BiH, FBiH i Hercegovačko-neretvanskog kantona strankama HDZ BiH, HDZ 1990, SDA i SBiH i dalje je na snazi.